



*A tirin, a businin, a van di ca e di là. Cuant che a colin a van indenant istes, gjatonant.*

Miezeombre, mûr di clap, il rivoc dai pas. E nuie altri.

«Une volte o ai let une storie».

«Tipo?»

«Tipo che al jere un, suntun tren, che al jentrave intun gatul e al coreve simpri di plui e chest al scomençave a pensâ che a scugnivin saltâ fûr, e invezit a jerin inmò dentri».

«Ah, e ce libri isal?»

«Ah, no sai, robe di scuole, dopo lu à spiegât la profesoress».

«Eh, bon, ma cemût finissial?»

«Al finès che nol finès, il gatul a va simpri indenant. Il tren no si ferme mai, però al cor simpri di plui. Dopo un pôc il tipo al capìs che al è alc che nol cuadre e al scomence a dîlu a ducj, ma no lu caghe nissun. Lui al è sigûr che no son gatui cetant luncs. La profesoress» à dite che je une *metaffora*».

*Un al tire, in fidance dal stralûs blanc che al divît lis taculis neris. Po al scomence a contâ: plui sangloç cui numars, che vôs.*

«Tas, tas un pôc».

Fredo e Minin si fermin.

Un rumôr, une sorte di vibrazion. Un cisâ che i pâr cori daûr de parêt, a man çampe. Il solêf al sotane un suspîr. Jerie forsit une machine? Che sedin dongje di une strade?

Fredo al tente di tignî la bale adalt cence fâle colâ, gnervôs. Il balon al fâs rimbombâ dut, i scjampe e al salte vie, glotût dal scûr.

«Coion!»

«E poben, no covente rabiâsi, voi a cirîlu daûrman», al ribat Minin, ma nol fâs moto di movisi.

Si cjapin par man, a tachin a vaî. Cumò no si vergognin plui.

*Chel altri al cor daûr a la bale, si met in zenoglon, al va indenant a palpe, tirant i voi fintremai che al cjate la sfere slisse sot i dêts, o cualchi volte che i scjampe vie, sfrontade.*

Trop timp isal che a cjaminin in cheste galarie? Miezore? Une? Di plui?

A son jentrâts par curiositât, lât indenant par cjavierstriarie e gole di sfide. No si son pierdûts - no si pues pierdisi intun gatul cjatât par câs daûr di cjase - ma no rivin adore a tornâ indaûr. Ogni volte che a provin, i somee che il cunicul al sedi diferent, che a sedin altris gatui e forcjâs.

Secont Minin, a fuarce di cjaminâ, a àn fat plui di cinc kilometris, Fredo invezit no i crôt: par lui a son ancje di plui. A van indevant, cui voi bas, par cirî il balon, fin che un al alçe il cjâf.

«Cjale! La fin!»

Une barconete di lûs ju cjale di lontan.

A scomencin a cori.

*Cjatade!*

*Al sighe, e al zonte un Aaahhh, un Caz, une blesteme. Al domande trop timp che al è stât, l'amî jal dîs. No i reste che fa il cont zontant ce che al steve tignint aments, ma i numars a scomençavin a jessi masse grancj.*

«Il gno al è lât in vacje».

«Il gno cuasit, ma nol cjape nuie. Se lu distudi no mi si pie plui».

A àn tirât fûr il telefonut de sachete cuntun sôl moviment, istintîf. Al è un pôc che no lu doprin, par fâsi lûs. Il gatul al è simpri compagn: pavement slis, in ciment, ma al podarès jessi ancje tiere ben folcjade, cussi come lis parêts.

Nissune glove, dome curvis. Ogni tant, dopo di cualchidune, a viodin un taront di lûs, la jessude.

A corin, ma il clâr si sfante planc planc. La fin no rive mai.

*Cuant che al è sigûr di vê fat ben i conts al busine il risultât. Dopo al poie il balon par tiere, al cjape la rincorse. Si scambin il puest. Cumò al tocje a lui contâ, intant che chel altri al cîr. Al è il lôr zûc. No si visin nancje cui che lu à proponût.*

Son sintâts. A àn fan. Il cuel al è fûc che al art.

«Sint...»

«Dimi».

«Ti vaie di inventâ un zûc cul balon?»

*Al cole, dopo chel tîr, nol à plui fuarce di contâ. Distirât tal scûr al spiete la vôs di chel altri, ma nissun al cjacare plui.*

*di Rafaël Serafin*

